

摘藻堂四庫全書薈要

集部

欽定四庫全書薈要

集部

小畜集卷

二十八至
三十

詳校官助教臣常循



欽定四庫全書薈要卷一萬四千一百五十三

集部

小畜集卷二十八

宋 王禹偁 撰

碑誌

右衛上將軍贈侍中宋公神道碑奉勅撰

并序

前普州刺史康公預撰神道碑

宣徽南院使鎮州都部署郭公墓誌銘

并序

諫議大夫臧公墓誌銘

并序

故侍御史累贈太子少師李公墓誌銘

并序



右衛上將軍贈侍中宋公神道碑奉勅撰并序

皇帝冕而躬耕之明年端拱紀號之二祀夏五月戊戌
上將軍邢國公薨開寶皇后之父也于後唐為外孫于
漢室為駙馬上聞之震悼有詔輟視朝一日贈侍中崇
戚里也嗣子銜恤上章請刻石于神道事下相府俾西
掖掌誥之臣考其實而文之於是詳求家牒叅用國史
論次功行直而叙云臣聞仲尼修春秋載王姬之築館
子長述史記列外戚之世家詩稱下嫁于諸侯傳云納

女於天子內所以敦睦九族外所以協和萬邦因副馬
以紀官著濯龍之通籍其來尚矣可得言焉然而或禍
敗自貽或微賤為累張敖漢祖之子壻孝惠之后父親
則親矣而貫高之釁生焉衛青平陽之所天子夫之愛
弟貴則貴矣而鄭季之出恥焉加以器盈則覆位不期
驕呂祿以后族而封王壯軍共擊班勇以父功而尚主
東市被刑簡冊具存驕矜可誡則有世開魯館家襲韓
壇享必復之公侯苟必大之門戶長守富貴無忝祖宗

兼將相之崇高居后妃之親族殊勲懿行溢美於青編
善始令終騰榮於明代者惟我故廣平宋公之謂乎公
諱偓字仲儉世居廣平號為著姓公以生于西都今為
洛陽人也其先微子啓以帝乙長子商受庶兄言不用
以歸周國既亡而封宋盛德不泯列于三仁垂裕下延
遂叅五霸綿綿瓜瓞世有其人遠則昌居代邸對周勃
以責公言近則璟立唐朝並姚崇而行直道至公家族
門閥益光累贈太子少師追封莒國公諱儼追封莒國

太夫人李氏大王父母也天德軍節度使開府儀同三司檢校太師兼中書令贈尚書令追封衛國公諱瑤追封衛國太夫人朱氏王父母也光祿大夫檢校司徒房州刺史累贈太師諱延浩後唐義寧長公主追封楚國太夫人考妣也皆積功累行克致高門翼燕謀孫遂鍾餘慶先是晉天福初房州太師用二千石為汜水關使張從賓之叛也力戰死之公即房州太師之長子也方居幼學爰喪父天晉高祖以公死政之孤貴主之子存

恤撫養俟其成人乃補殿直俾奉朝謁尋遷供奉官時
天福三年也重以晉祖常事莊宗有舊君之禮每貴主
入見聽其不拜時兵戎方熾經費不充惟公之家賜與
甚厚盡而復取亦無倦色一旦晉祖從容謂貴主曰朕
於主家無所愛惜但朝廷多事府庫甚虛主所知矣今
輦轂之下桂玉為憂可命倕分司西京以豐就養因厚
遺之且勅留司具晨昏伏臘之用至於醢醢率有備焉
既而漢高祖為侍衛軍朝望攸重以公名家子又後唐

之出也且風骨俊秀異乎諸孤欲以女妻之乃命長子承訓奉書于貴主且先以襲衣名馬遺焉承訓即漢之開封尹魏王也公與貴主拒而弗納漢祖又勅其子曰宋氏不諧勿復見我矣貴主知志不可奪遂許之及漢祖出為北京留守表公偕行因補衙內都虞侯七年漢祖使公修朝貢之禮禮成而退恩寵有加特授銀青光祿大夫檢校右散騎常侍兼御史大夫上騎都尉充北京武德副使少主嗣位改北京皇城使尋遷檢校刑部

尚書輕車都尉時開運元年也三年加檢校尚書右僕射上輕車都尉俄屬疆場失守戎虜亂華漢祖首建義旗遂成大業睦姻行慶公寔首焉授金紫光祿大夫檢校司徒守右金吾衛大將軍兼御史大夫上柱國廣平縣開國男食邑三百戶駙馬都尉世祖微時常羨執金之任魏朝納壻但求傳粉之容兼而有之斯足貴矣時漢氏雖建大號猶用晉祖之正朔即天福十二年四月也九月加光祿大夫檢校太傅行右金吾衛大將軍充

街使進封開國伯增食邑四百戶賜開國奉聖功臣既而改紀年之號覃在宥之恩矧茲勲戚之家固被便蕃之澤乾祐元年特加進封開國侯增食邑五百戶少主之嗣統也在諒闇之中念藩垣之重乃以斧鉞付于親賢授檢校太尉使持節利州諸軍事行利州刺史充昭武軍節度使利巴集等州觀察處置等使進封開國公增食邑五百戶寔封二百戶改賜開國奉聖保定功臣嘉州異俗綿谷舊封素推設險之邦遙仗建侯之利位兼

掌武不亦優乎二年十月出鎮滑州增食邑五百戶實
封二百戶外韋舊都虛昌古郡貞臧師律初登南鄭之
壇藩翰王畿實主北門之管年猶未冠議者榮之無何
將相分權君臣失道周祖出潛淵而或躍知寶命之在
躬戡黎之功已歌於西伯升陟之衆遂指於南巢公動
識幾微深明禍福以為不周已折建一指以難扶大寶
有歸順三靈之改卜周室肇基慶澤首被徽章廣順元
年增食邑一千戶實封三百戶改賜推誠奉義翊戴功

臣三年春丁楚國太夫人憂哀毀過禮親族憫之服闋授左監門衛上將軍增食邑五百戶實封二百戶禮卒通喪恩隆近侍周廬有坎環閭闔以無虞羽衛載嚴致華胥之甘寢世宗之伐淮夷也公實從焉授右武軍衛統軍壽州行營副部署兼右廂排陣使屬王師漸老戎輅再征江南大率舟師次于東汴洲下斷我蘇杭之路也世宗遣公率戰艦數百艘以襲之且命襄帥慕容延釗領輕騎登陸而進與賊遇于江中合勢大戰盡破之

時世宗蒙犯矢石跋履山川多為野廬以駐行闕忽有
猛虎近于乘輿公引滿注之一發而斃叛命之邦既摧
枯而拉朽啗人之獸復食肉而寢皮豈比乎樓舡將軍
徒矜水獸射聲校尉但署虛名而已哉既而劉贍委誠
納款李景割地稱臣班師旌淮甸之功議賞復滑臺之
命五年五月授義成軍節度使其制略曰長驅下瀨之
師若涉無人之境夷寇戡難爾既立於殊庸礪岳盟河
予豈忘於豐報云南燕舊邦北闕孔邇河壩作翰遙臨

白馬之津穰下統戎即鎮卧龍之地十二月移鄧州武
勝軍節度使六年世宗以焦勞厭代恭帝以冲幼承祧
方賴勲臣爰崇異數授開府儀同三司增食邑五百戶
實封二百戶我太祖神德皇帝象叶泰階功高大麓顧
命雖同于伊霍謳謠不在於丹商樂推而逼乃民心揖
讓而授茲神器維新布命方隆萬世之基念舊推恩乃
冠三師之秩建隆元年授檢校太師增食邑五百戶實
封二百戶于時李重進凶猾無厭跋扈有狀公明惟先

見志在奪謀飛章述其包藏密旨委以經略故有通州
巡警之役焉既絕南奔之路遂下東平之詔重進奸謀
果發王命不行太祖親御六師直抵孤壘以公為揚州
行營排陣使列牧野之車徒法常山之首尾師方困壘
城以復隍格苗不待於七旬圍蔡止勞於九日蕩平兇
豎公有功焉飲至之辰首膺茂渥七月授廬州保信軍
節度使增食邑五百戶實封二百戶旌戰功也合肥重
鎮巢國古墟雖張遼守潘克清淮海而子牟戀闕終捨

江湖四年夏十乘來朝三峰改鎮授華州鎮國軍節度使鄭桓咸林之地素號豐饒晉侯河外之田舊推形勝三輔既資于鎮撫雙旌更遂于優游國家展禮園丘推恩羣后錫之懿號疇以井田乾德元年增食邑五百戶實封二百戶改賜推忠宣力保義功臣是歲太祖以坤道闕儀中宮虛位以公之世有行義可以合禮文以后之天資法相可以當人主初求輔佐遂上宮闈沙麓休徵果叶母儀之貴睢鳩雅興聿興王化之基亦何必射

孔雀以設奇鑄金人而語怪然後稱其神異哉既列外
姻乃移近甸五年授許州忠武軍節度使開寶元年增
食邑一千戶實封四百戶改賜推誠宣力同德保義功
臣假鄭伯之田時惟重地加紀侯之爵蓋有前聞三年
授邠州靜難軍節度使加押蕃落等使拍公劉之舊壤
位重十連異魏冉之出關從車千乘四年冬以郊禮霈
澤加食邑一千戶實封四百戶八年冬平東吳之列國
九年夏幸西洛以告成乃睠庶邦咸均井賦增食邑一

千戶實封四百戶俄而太祖以南巡狩蒼梧奄逼上仙
之數東園畫梓遂纏同軌之哀我應運統天睿文英武
大聖至明廣孝皇帝飛龍在御元龜告符大橫庚庚叶
重熙於常棣小心翼翼賚兌澤於蓼蕭公奕世將門先
朝內戚專征受命已持閫外之節旄爰立登庸更作人
間之霖雨授同中書門下平章事公既荷寵章乃修覲
禮輯瑞有光于文陛建牙復命於名藩二年冬授同州
定國軍節度使內史舊甸長春古宮澤湧若泉昔謂豐

年之地草連沙苑斯為牧馬之郊殿我大邦實惟舊德
三年冬皇上初陟泰壇大崇方岳增食邑一千戶實封
四百戶洎我后大平并寇親御戎衣公以扈從之勞享
疇庸之典四年冬增井賦實食如三年之數越明年胡
人犯塞法駕親征隨行在於鄴都委邊事於橫海以公
知滄州軍州事擁左馮之旌旆臨滄水之封陞委注方
隆威望愈重尋以遷封罷警朝命就藩六年冬上祀昊
穹再陳柴燎爵邑之等率有異焉封邢國公井賦食邑

如前乾德元年之數九年六月奉詔歸朝登于禁衛居中制外爰陞拱極之班以逸代勞亦示優賢之禮出入之重又何加焉授右衛上將軍雍熙元年冬增食邑五百戶郊天之澤也三年詔以本官知霸州軍州事未幾徵歸荐居環衛皇上方耕春籍復益邑田加食邑如雍熙元年之數是歲公再受命兼判左右金吾衛仗事緹騎二百尅靜神州金門九重遂成高枕徼巡無怠儀位有光方將起灞陵夜獵之娛赴瀚海防秋之役而後宮

親屬終久次於閭章絕塞功名遂不侔於竇憲齒駸向
暮寒暄荐瘥中使御醫旁午於道寢于北牖歎二豎之為
妖升自東榮遂三呼而不復享年六十有四即以其年
冬十月二十五日葬于河南縣龍門鄉宮南里從房州
太師之塋禮也詔以中使護其喪事先夫人劉氏晉天
福中封彭城縣君開運中進封郡君皆從夫人之貴也
漢祖開國封永寧公主少主乾祐中進封秦國長公主
周顯德中改封彭城郡夫人尋進封京兆郡夫人公之

將葬也開寶皇后泣血上言請加褒贈特詔追封曾國夫人非常典也惟夫人素稟肅雍早從釐降雖襁華已謝而愆問常存天陰本高不繫夫而命爵母道克備寧為子以求郎用能符夢月之嘉祥誕配乾之陰教新野封君之號雖漏典彝文靈園邑之儀更光泉壤繼室以隴西李氏故保大軍節度使洪義之女也開寶中封隴西郡夫人先公而亡象服是儀求歸同穴今夫人彭城劉氏故左省常侍悅之女也太平興國中封莒國夫人

柏舟自誓常歎未亡有子十人長曰元吉終于西頭供奉官次曰元振終于邠州節院使次曰元靖西京作坊副使次曰元規前同州子城使次曰元度前同州親事都頭次曰元方終于同州山河使次曰元載元翰俱未仕一子幼而未名皆早聞詩禮不墜箕裘萬石君之子孫世惟朴謹竇太后之兄弟人言退讓承家幹蠱未易可量女十五人開寶皇后即其長也次適崇儀使韓崇訓封廣平縣君其次未嫁而亡次適西頭供奉官郭守

能次二女皆早亡次適孟隆諗即右龍武衛統軍元喆之子也次適曹守讓即左驍衛上將軍判金吾衛仗事翰之子也次適西頭供奉官高處榮即故渤海王懷德之子也次適董嗣顯即故通遠軍使遵誨之子也次為比邱尼法名惠圓餘皆幼天母弟三人故宮苑使延業即其仲也今莊宅使益州內外都巡檢煦即其叔也叔氏有子元興進士第補祕書省著作郎直史館秀而不實今也則亡故許州衙內都虞候延稹即其季也其餘

女兄女弟猶子令孫殆三十餘人譜牒備存此不復載
或鶚立周行或蟬聯甲族畢萬之家既盛固有本根陳
完之後其昌可知光大惟益部巡檢出自將家雅好儒
術雄材偉度朝論多之惟公生積德之華宗居累朝之
懿戚富而好禮貴而不驕始以勲德之家特膺選尚終
兼廟堂之位遂極人臣功名享八字之褒封食疏萬家
之賦至于姬公太師之任黃權開府之資上柱國楚之
寵官上將軍漢之重柄位列亞相爵為國公再居金吾

再霞環尹家出帝后室惟貴主藩籬八鎮周旋四紀有
戰功以書史有世祿以傳家列振振之子孫啟渠渠之
夏屋出則建崇牙開大幕有琯戈玄甲之徒奔走于戲
下有影纓結珮之士羅列于初筵入則挺介圭峨武弁
有形弓湛露之樂讌饗于公朝有文馬乘車之賜勞來
于私第家祭五廟陳樽彝分器之數食具萬錢得鳴鐘
列鼎之盛而年將耳順命以考終人無間然可謂達已
昔人云躍馬肉食者四十三歲器何小哉前史稱朱輪

華轂者三十三人禍亦大矣始終無悔公實有焉宜乎刊勒豐碑光表幽宅俾我休烈與宋無疆者矣臣掖垣備位論譔非工受明命之已行率謏聞而塞職五月而葬素車方會於同盟百代可知樂石願垂於不朽銘曰天地之道曰剛與柔后妃之德在河之洲媯汭釐降塗山好述乃睦九族乃親諸侯大國之援外戚之助史不云乎列侯尚主詩不云乎大邦有女夫婦以正國家以固日中則移月盈則虧富祿后族人得誅之梁冀外家

鬼其餒而簡冊具載居高必危休哉宋公勲戚累世唐
之外孫漢之主壻乃生聖后作配先帝富貴崇高光華
譜系維公之始生于紉綺晉主撫之同乎已子漢皇妻
之實為知己曾未弱冠剖符千里維公之中深用變通
鵬冠環衛虎帳臨戎壽春維揚實有軍功連移巨鎮克
振英風維公之終我朝懿戚為將為相以年以德罷殿
侯邦乃尹環極能執干戈以衛社稷嗚呼勲賢弗登大
年薨于路寢像列甘泉恩隆賻贈寵賁貂蟬邊功未輯

遺恨依然其誰祔之永寧國邑昔也築館秦樓岳立王
姬之車星繁霧集今也同穴沁園雨泣貴主之墳煙愁
露濕其誰哭之開寶宮中昔也歸寧車服有容爛其盈
門姪娣以從今也哀凶怙恃弗終號天罔極鞠育何功
乃會同盟乃先遠日丹旆悠悠佳城鬱鬱薤露淒咽松
阡蕭瑟萬古龍門豐碑屹屹

前普州刺史康公預撰神道碑

立功名之謂賢齊得失之謂能悟生死之謂達三者有

一則可謂聞人矣况兼之乎其誰則然吾見于康公矣
公諱延澤字潤之代北人也其先蓋夏后氏之苗裔曰
淳維世有北土自立君長其別處康居者即始祖也西
漢時康居國王納質于大單于其後單于內附遂有雲
中以國為姓曾祖嗣皇任蔚州蕃漢都知兵馬使累贈
太子太師祖諱公政皇任代州都知兵馬使累贈太傅
考諱某皇任河中節度使檢校太尉兼侍中贈太師謚
曰武安公其世祿世功載在武安碑此不復書公即太

師之次子母衛國夫人高氏晉天福中起家補東頭供奉官歷漢逮周垂二十載艱難險阻靡不備嘗以功轉染院副使我太祖神德皇帝之開國也以荆湘未下詔宣徽南院使李處筠襄帥慕容延釗出偏師南討而公寔從焉時江陵高保融死朝議以其子繼冲權領軍府因命公齎璽書乘驛騎以弔撫焉且視便宜二帥留襄陽以待之公宣諭而回盡得機事前導師旅長驅而南平定荆湘易于拾芥尋轉染院使監護荆南軍賞功也

乾德中受代歸朝會國家有平蜀之役詔公為北路前
軍都監至固鎮主將王全斌請公領前軍先入以張萬
友佐馬尋擊白水閣子二寨破之勒兵會乾築渡下蜀
人恃險出萬仞寨以待王師以公與萬友選死士百人
先登水西寨以兵繼之縱火燔燒柵木俱盡遂取之明
日全斌中軍方至乃合逼置口走之遂下興州與夔峽
兵合進擊西縣三泉生獲偽興元節度使韓保貞公皆有
力焉由是乘勝討逐越大小漫天累戰皆獲赴利州夜

半拔之蜀人由桔括江以遁乃燒浮橋保劍門恃天險也諸將方議進擊會有蜀卒來降自言知山川道路且告曰自益光江東有路曰來蘇直抵劍門南二十里蜀人設寨以阨之此捷徑也於是全斌欲自来蘇路入諸將莫有言者公曰來蘇小路無煩主帥可使偏裨以副大將親扣劍門劍門精兵所聚也且蜀人聞來蘇軍入必分兵以禦我此必克之勢也乃命公與史延德往焉公曰書稱徯我后后来其蘇今路名來蘇天啟弔伐之

義也遂舍車馬披榛梗而蜀帥王昭遠趙崇韜果留小
將守劍門引軍于青強店下由是全斌克劍門獲王趙
二將席捲而西矣時蜀世子元喆統銳兵守綿州聞劍
關不守乃棄城而去蜀主遂令伊審徵奉表歸順全斌
因請公以一百騎先入成都安撫軍民且伺必降之意
是時蜀國餘兵尚有七萬公往也人情危之公既全以
二十騎自衛入見蜀主諭以禍福示以恩信蜀之君臣
舞蹈感悅留三日盡封府庫齎魚鑰而還全斌等遂平

蜀國遣蜀主歸于京師詔公為成都府兵馬都監而蜀軍復亂且以全師雄為首所在殺知州通判以應普州劉澤遂州王可寮果州宋德並授師雄偽署朝廷以公為普州刺史公詣全斌請衛兵赴理所與公四十人公發成都至簡州招敗亡之士得刀手一千人取器甲以給之乃教戰陣立部伍擁之而去至郡境有賊甲雕領衆五千來犯公一戰敗之擒七百人授偽命者立斬乙百輩餘皆釋之乃懸榜示人諭以逆順招集團結得刀

手三千人敗劉澤三萬人自是賊勢稍阻公雖至普州
解宇盡為煨燼乃依山設屋權駐師徒而兵亂之餘無
食可守公披攘羣盜且戰且行直至遂州輦運儲蓄以
至成城畚鍤靡不具焉既而王可寮等數郡賊兵合勢
來戰公又敗之遂至合州赴江溺死者不可勝紀未半
年普遂果簡昌合等六州飛奏以聞優詔褒美且命與
曹瑯充東川七州招安巡檢使仍賜錢帛委公等隨軍
賞給自全師雄亂後東路艱難賊害使臣抄掠琛賁者

多矣時師雄雖死賊衆尚有萬人立謝行本為主以羅
七君等佐佑之間公警巡望風而遁遂以賊衆保于金
堂非公所部也公乃越境以討之賊衆又遁因駐師以
待馬卒平狂寇先是金堂新都洛縣等民為賊逼脅皆
餉饋資給之公則出令招誘許以自新約自不來無少
長皆殺民歸者萬餘戶咸得安堵輸稅縣官故民心有
懷賊黨自潰加以全斌等同心經略兩川悉平及奉詔
班師主將獲罪皆以殺降兵受蜀賂故也黜公為唐州

教練使天下人為公惋歎公處之自若不出怨言惟築
室墾田聚書訓子而已十年間闢草萊植桑柘居泌水
之上遂為富家家到于今賴之開寶末太祖幸西洛祀
南郊始起公為供奉官留監左藏庫今上即位就除左
藏庫副使兼水北皇城大內巡檢又召公為東京畿內都
巡檢使俄而公之猶子六人皆恣用家財不事生產公
以禮義勗之反生怨懟乃撾登聞鼓願析祖業以自給
詔公以理處割事未定會靈昌河決公受詔塞之諸子

復訴公違詔遂罷使職退居洛陽不數年向之猶子已
饑寒于道路矣上躬耕之歲公會恩例當起權河南尹
許仲宣頗相勸激公曰三代為將道家所忌吾自蔚州
太師而下世傳將帥今幸功名以繼祖禰年享壽考運
逢理平使子與孫去橐鞬襲縫掖熙熙自樂以終天年
吾願足矣吾嘗讀李廣傳見其兵敗削為庶人幸匈奴
犯邊被召而起及軍吏責薄自刎帳下欲望灞陵夜獵
其可得乎古人成敗取則不遠以老疾為辭而奏其二

子馬淳化三年公七十六矣一旦謂其子懷珪曰吾衰
耄若此死在朝夕苟以先太師之靈得保首領以沒于
地吾無恨然吾有平蜀微功思預刻吾墓其誰能之吾
聞商山王副使舊直紫微有文稱于代又嘗任長洲宰
時汝為姑蘇從事亦同僚也試為我請焉懷珪曰預凶
事非禮也且心所不忍公曰此人子之大情名教之舊
制也吾則不然且古之達者以生為寄以死為歸今吾
官歷二千石年踰七十六吾不死而安歸乎吾欲生前

自視其文知辭無愧而功不誣也懷珪不得已命其子
齎書而來某據事狀次而書之大率平蜀之功公居第
一離而辨之其功有五若先入蜀境擊白水閣子二寨
開王師破竹之勢其功一也徑入來蘇分蜀人精強之
力使劍門勢解其功二也以二十騎入見蜀主其功三
也以四十人定普州其功四也越所部擒羅七君其功
五也至于謨議機權賞罰威戮所不盡者有公之自著
平蜀實錄在焉初全師雄之亂也諸將議殺降兵二萬

七千人恐為內應公獨請擇老幼疾病者七千人釋之
然後起二萬人以十人為率皆反接之若連雞貫魚桴
江而下以兵衛之比賊衆知之可二百里矣若寇來劫
奪殺之于江如此則殺有名矣雖不見用可謂仁乎後
國家議罪果以殺降為名有先見之明不免于戾者命
矣夫公形貌魁傑知謀宏遠剛而有變勇而能仁負將
材喜兵法雖為王公之子恥以恩澤封侯故能立功於
當年齊得失以知命悟生死而無懼雖古之名將世之

達人何以過此與夫伏劍而悔降兵仰藥而罪地脉者
不亦賢乎公始娶安氏蔚州別駕某之女也先公而亡
男五人長懷玉進士不第早亡次懷珪前平江軍節度
推官試大理司直次懷理以侍親幹家未聽入仕次懷
璟懷璉並補三班奉職孫二人贊華舉進士贊臣尚幼
公再娶李氏封隴西縣君秦王儼之第七女也以某年
某月某日終于西京私第某年某月某日葬于某鄉某
里禮也銘曰神德皇帝駕馭英雄始即南面乃平西戎

孰為前蒐時維我公白水寨碎來蘇路通劍門天險一
旦憧憧蜀既送款衆尚七萬其誰先之公膺是選擁二
十騎揚鞭入見諭以禍福蜀民舞抃事訖而還王師席
捲全蜀雖定羣雄未收帝命我公毆攘懷柔刺舉一郡
警巡七州盜死原野人服田疇定功議賞理當封侯孰
為獫狫唁唁吠叫謫去泌陽前勲弗較三月不仕古人
相弔矧惟我公十年不調不調維何熙熙而笑太祖起
之厥官尚微我后增秩暮年有輝徽巡西洛按察東畿

竟坐家事終成罷歸君子知命達人息機先人敝廬可
庇風雨知止知足何思何慮慶見曾孫名揚先祖謂死
為歸預銘厥墓不朽之功永光隴樹

宣徽南院使鎮州都部署郭公墓誌銘并序

郭氏之先號叔之後也號郭聲近因而改焉婚閥軒裳
代為著姓自兩漢兩晉而下其間立大功居顯位者不
可備書有唐已來孝恪為佐命之將汾陽王子儀代公
元振皆人傑也本大枝茂侍中公當之公諱守文字國

華并州太原人也曾王父諱湛贈太子少保曾祖母劉氏追封彭城郡夫人大父諱乘贈太子太傅祖母郝氏追封太原郡夫人考諱暉贈太子少師妣趙氏追封天水郡太夫人皆從公之貴也公即少師之長子少師在漢為護聖軍使從征蒲帥李守貞先登而歿時公尚幼周高祖見而竒之名置帳下旌死事之孤也洎授禪元年補左班殿直且以銀印青綬崇其階級用國子祭酒司憲大夫紀其官氏上騎都尉策其勲伐起家之命有

足優者時廣順三年也世宗嗣位檢校冬官卿加上柱國時內職東西兩班各置押班之名又署都知之職公皆任焉顯德中徧歷禮部刑部二尚書待之雖優用之未至公韜晦而已但以謹愿聞我太祖神德皇帝之開國也素知其名建隆初遷地官之長充西頭供奉官三年改大司馬開寶中授太冢宰是時太祖經營四方有澄清天下之志勵兵謀帥之外所難者乘使車傳密命之人久始得公以用之公既以知己之主難逢亦以使

者之才自許往復萬里不逾浹辰敷奏閒詳動中上旨
西蜀平以公知簡州軍事夷落未化寇攘孔多公視盜
以威撫人以惠人安盜息公之力焉開寶四年問罪嶺
表公與其行遠馳捷音數日而至授右僕射翰林副使
八年下金陵虜偽主是役也公亦往焉太祖以李煜恃
險累世勞師踰年慮其懼罪自圖有傷國體詔公監送
之公待以周旋加之開釋嘗謂曰國家止弔苗民之頑
不責防風之後也以至俘于端門獻之清廟公之智也

太祖嘉之賞賜殊厚九年二月遷左揆改西京作坊使翰林職司如故四月封南陽開國男食邑三百戶是歲從曹州節度使党公禦胡騎於團柏谷大破走之璽書慰勞今皇帝即位之始乃作司空太平興國三年以西羌弗寧秦隴騷動詔公安撫和輯之丁內艱而歸哀毀過禮未幾授起復西上閣門使上行郊祀之禮霽雷雨之恩俾遷司徒以敷五教四年上載木主御戎衣討汾晉之邦除腹心之疾以公為河東行營馬軍都監兼先鋒

使時多為地洞以穴其城且命公提舉經略之渠魁面縛戎輅凱旋公實展其力先是王師之未至也劉繼元以其弟繼文軍于雁門以張犄角至是尚守孤壘以招犬戎詔公赴之棄城而遁車駕還以公為定州駐泊兵馬都監冬十月胡馬南下公出禦之遇于蒲城一鼓而潰遷東上閤門使澶州刺史旌戰功也五年冬十月復有常山之命會戎人攻我雄州公承急詔領輕騎以援之狂虜望風而退六年冬上再郊園丘大賚羣后加金

紫階進開國子增食邑五百戶七年奉詔歸朝明年遷
內客省使仍以郡印虜之雍熙元年進封開國侯加食
邑一千戶卜郊之澤也二年春二月有并州駐泊之命
三月就遷武州團練使內省之職不解五月夏州白狄
之戎叛公往招誘之至則張以軍威諭以朝旨誅逆撫
順蕃部便之三年春大舉征燕之役以公為幽州道行
營前軍馬步軍水陸戰棹都監其初也繼上捷書累賜
優詔公以暑雨將降師老為憂力戰方酣忽中流矢公

聲色不變人莫知之俄而我師不利朝議左遷授右屯衛
大將軍斯蓋馮異迴溪之敗仁貴大非之失也四年春
特拜宣徽北院使充鎮州駐泊北面排陣使端拱元年
上脩帝籍祀先農恩例之行乃遷太保加食邑一千五
百戶改宣徽南院使夏五月詔許入覲聽其休沐秋八
月召詣便殿付以密旨授鎮州行營都部署二年夏五
月兼領鎮定高陽關兩路排陣使百萬之師四七之將
萃于是矣公以威愛撫下以和謙御衆有譽無毀時論

多之方將伸威大漠刷恥蹕林焚老上之庭橫行城外
繫單于之頸牽致闕下公之志也人之望也天不憖遺
忽馬薨殂於十一月九日捐館于鎮陽公署享年五十
有五上聞之泣下特詔輟朝兩日贈侍中皆非常例也
遣黃門護其喪樞喪事之費給于縣官以淳化元年某
月某日葬于東京某縣某鄉某里禮也公娶梁氏封安
平郡夫人有子四人孟曰崇德承奉郎守太常寺太祝
仲曰崇信叔曰崇儼皆為西頭供奉官季曰崇仁幼而

未仕有後之義其在茲乎女二人長適殿直張永福左
千牛衛將軍再興之子也次許忠武軍節度使太師潘
公之孫未行而卒公學軍旅之事負將帥之才綿歷兩
朝遭逢四主閫外之政多識便宜禁中之言未嘗漏露
守封疆則盡命援桴鼓則忘身家無餘財軍有遺愛降
年不永大勲未立可痛惜哉嘗試論之曰自古畫策安
邊銘功絕域者趙充國班定遠稱為名將然皆年餘七
十垂老窮荒而後能著其效非一朝一夕之故也向使

公天假之年如二賢之壽則醜虜不足平也見託勒銘直書無愧其銘曰天難謀兮命靡常國不幸兮人云亡公之生兮威加北荒何以貴之兮駟鐵彭彭公之沒兮魂遊東岱何以贈之兮珥貂煌煌遺英風兮傳雁塞閔貞魄兮啓牛岡銘真宅兮照茂績隨地久兮天長

諫議大夫臧公墓誌銘并序

淳化二年春三月詔以右諫議大夫臧公知江陵府事四月至理所八月得微恙猶視事不輟明年春疾亟不

能出外屏飛奏以聞上命中貴人領御醫乘驛視其病
禮之如將相既而餌藥皆不効肩輿歸京師以五月某
日終于私第年五十三上聞之軫悼且問其嗣或奏曰
有子待用未冠乃授國子四門助教以某年某月某日
葬于某州某縣某鄉某里執友太原王某哭而銘其墓
公本諱愚字仲回因夢先洗馬導從入其第呼公立階
下且命仰視曰老人星見矣公夢中如教見星明潤大
若圖牒所載者再拜而寤私喜曰吉祥也以壽星出丙

入丁乃名丙字夢壽公年十七八始執筆為四六文字
甚有風采故兵部侍郎王公祐以監察御史裏行宰大
名之屬邑先洗馬事魏王符公彥卿為要職每王公詣
府必厚為供帳館王于第且出公拜而以所業師焉王
公覽之歎異曰此子可教若進修不已當為聞人後變
格慕韓柳文頗近闡閩既冠丁父母喪哀毀成疾伏枕
者彌年家財鉅萬悉以散朋友親戚視之糞土如也產
將竭而疾亦愈遇日者于太行山中言公四十當成名

公信之因落魄於杯酒間又雅善音律音律者章程之
伎為時輩所推服嬉遊任俠者十五餘年上即位之歲
一舉登進士第解褐大理評事通判大寧監監之所職
煮井為鹽先時主事者悉多逋負械繫不減百人公問
其故咸曰鹽之要在積薪于夏秋煮井于冬春則輯事
矣向者官給柴本錢主事者恣為私用薪既不登鹽將
安出公因取其質而給其價故薪聚如山迄公一政無
被責者受代之日人為之泣下是歲上親征太原見于

行闕授太子右贊善大夫并冠平以公知遼州軍事有
偽署衙校劫盜于民者公械送朝廷時以舊染之俗務
從寬貸因赦其罪復補衙職公禮待之且約無再犯不
踰月劫盜如故公捕獲之皆磔裂而徇然後以聞有祕
書丞馬汝士者公進士同年也以本官知石州為政嚴
急軍民苦之且與監軍不協一夕于公署中刳及在腹
而斃遂以自盡奏之公上疏理其事其畧曰倘明其負
罪自裁屍宜更戮苟雪其非辜致斃魂亦無冤上覽之

駭異遽命按其事且召公還便殿與對上問公曰馬汝
士遇害爾知其人乎公曰人則臣不知言自盡則厚誣
也凡人罪非殊死未有棄其生者臣觀汝士所為畧無
私過蓋盜憎民怨爾然汝士一夫之命不足挂聖慮但
祕書丞是陛下五品朝官今死既不明宿衛者亦不加
罪臣恐今後書生不能治邊郡上為沉思久之勉勞使
罷留監在京茶庫繼賜錢五十萬遇郊裡加著作郎太
平興國八年拜右拾遺直史館賜銀章朱紱尋知許州

在許三年急吏緩民而已遷河東轉運使積粟餉軍邊
用稱足上籍田之歲以恩例加尚書工部員外郎直史
職轉輸如故歸朝授戶部郎中面賜金紫且詔知審官
院事上重四品官轉司農少卿未幾有大諫荆南之命
辭日賜錢千萬之任多病卧治而已公為人廉直剛決
仁義忠信知止足不苟且與人交禮簡而情至故久而
彌篤凡妻之昆弟姊妹之壻接之甚謹雖竟月踰年語
不及于私褻人以此為難監茶庫時今少府少監雷有

終以殿中丞與公同事故真定王再入中書權貴德望
熏灼天下朝臣得一見與語者自以為榮公朔望投刺
未嘗求見真定使人名公公未至使愛子羽林大將軍
承宗達其意是時某以舉進士館于公家嘗勸公速往
公乃脩謝啟緘封訖復遷延數日某問其故公曰趙侍
中不樂雷氏衆所知矣今某與雷同職不告而去恐招
物議因白于雷雷果曰此無他欲使著作伺吾罪釁矣
公乃焚其啓終不詣真定其不趨權勢也如此惜哉不

享上壽不登大用命矣夫公之世祿世功洎昭穆鄉里
詳洗馬誌中公即洗馬長子娶張氏封清河縣君子二
人助教長也次曰某女一人適進士楊雲卿銘曰胡為
乎有生去來兮靡恒吉夢惟星兮竟亦無徵浮生一夢
兮營營薨薨夢中之夢夫何憑嗚呼丙父名令圖洛陽
人

故侍御史累贈太子少師李公墓誌銘并序

給事中判河南府兼留守司事李公將葬先少師走僕

求誌其墓行狀云公諱某字某趙郡人廣武君之後也
亳州團練使太清宮副使諱幹曾祖也秦陵令贈太子
少保諱豐祖也洺州團練判官贈太子少傅諱滔父也
公幼孤事母以孝聞有文行為鄉里所稱方將決科名
取貴仕邢帥薛懷讓知其名奏觀察支使公以迫于就
養不暇擇祿帥移左馮復授記室得五品服色丁母憂
護喪歸洛舉先少傅合葬焉制終得輅屋令秩滿歷邠
州觀察鳳翔節度二判官尋為朝士推薦入拜殿中侍

御史掌梓州榷鹽院歸朝奉詔知舒州軍州事時太祖
問罪金陵彌年未下沿淮諸郡供億百端勤王之功舒
實為最公以悅使民民以樂輸未嘗鞭一人呵一吏而
餉饋之用集矣朝廷議其勤就加侍御史以太平興國
元年八月二十二日寢疾終于治所享年若干給事之
始登朝也贈某官入西掖又贈某官在中書超贈太子
少師夫人周氏故邢州節度判官琪之女也以孝謹事
先姑以慈嚴訓諸子賢明之行宗族稱之始封汝南臨

潁二縣太君又進封汝南郡太夫人淳化四年閏十月
二十二日終於東京私第四子長曰沆給事是也次曰
贄著作佐郎次曰源太常寺奉禮郎次曰維官與贄同
三女長適武功蘇昌嗣麟遊縣令次適太原王永孚審
州錄事叅軍次適沛國朱貽孫皆良壻也以某年某月
某日祔葬於西京某縣某鄉某里從先塋禮也公自從
事至臺端率以寬簡為政所在民吏愛而思之儒學之
外雅好易象老莊之書復能踐其言而行其道外累不入

中心晏如居官清不近名直不忤物得俸祿隨手而盡
未嘗有意于治生唯教誨諸子早夜無倦餘慶鬱積給
事當之用是為近臣參大政文章器度時稱巨賢而立
朝之士有識少師者必曰給事履行寔得父風及罷政
事丁外艱而執喪食貧殆不能為禮上聞之歎異賻贈
有加維也文學亦如其兄其餘俱成令士三代贈典皆
從子貴積善之道豈誣也哉今以二品之禮葬少師之
服歛不亦哀且榮乎初給事直館殿知制誥入內署佐

中樞而太夫人尚無恙朝請之暇兄弟舉觴為壽慈顏
既和綵服起舞盡懽而罷率以為常每至入宮壽寧祝
聖婦姑相望肩輿煌煌人臣及母之榮無以過此非父
嚴母慈兄良弟悌疇能若斯其盛歟銘曰李氏之先廣
武稱賢子孫綿綿少師燕翼位不克德餘慶鬱積給事
堂堂邦家之光庸詎可量既贈其父又封其母積善之
報孝子顯親納石於坟刻為斯文

小畜集卷二十八

欽定四庫全書薈要卷一萬四千一百五十四集部

小畜集卷二十九

宋 王禹偁 撰

碑誌

故商州團練使翟公墓誌銘

并序

殿中丞贈太常少卿桑公神道碑

并序

右衛將軍秦公墓誌銘

并序

殿中丞贈戶部員外郎孫府君墓誌銘

并序

累贈太子洗馬王府君墓誌銘

并序

故商州團練使翟公墓誌銘并序

公諱守素字昭儉濟州任城人也其先蓋漢丞相方進之裔也曾祖諱某皇任某官祖諱某皇任太子少保致仕考某皇任率府公即率府之次子也天福初以蔭入仕補左班殿直轉供奉官自晉至漢時亂位卑祇役不暇故勤雖至而功未立矣洎周高祖以來奉皇華將密命號為稱職者屈指比數公首與之世宗初平淮甸詔公為蘄州兵馬監押兼沿江巡檢善修其職遂改承天

軍使自是聲績聞于時矣我太祖神德皇帝乾德中始
議平蜀用許帥王全斌為主將且擇使臣恭謹者隨軍
任使而公寔從焉蜀既平公奉捷書馳驛騎入奏太祖
嘉之擢授引進副使時故中書令石公以佐命元勲始
拜平章事鎮汶陽乃詔公為鄆州生辰國信使賞勞也
尋加判四方館事且以全蜀雖下羣盜未息再命公分
屯士卒經畧郡縣乘傳往復頗得機宜由是益親信矣
開寶中麟府二州番族騷動以爭地不決聞于朝廷公

承詔和戎部落悅服扈從輦輅薄伐并州轉引進使出
為成都管内十州都巡檢使賜錢五百萬謝日復受宣
充鳳翔府魏王符公官告使公以錫賚優厚懇讓不已
太祖曰汝十州巡警煩費亦多不足讓也當時寵任在
同列間鮮有其比及受代歸朝會淮海王入覲命公迎
勞頗得禮容并寇稽誅大勲未輯公與洛州防禦使郭
進領偏師侵掠深入敵境至五臺縣界取禾蹂稼寔有
力焉今上嗣寶圖行兌澤授客省使憲州刺史會梅山

洞蠻恃險叛亂受詔為都部署招懷討擊五谿悉平淮
海王納版圖奉朝請公為兩浙十三州安撫使尋知杭
州軍州事勞來安輯浙民便之政成詔歸為西京都巡
檢使因權知河南府兼留守司事浩穰之政雅亞上都
簡事勤公月餘自理加以修宮闕奉輅轉貴倖旁午終
無間言加商州團練使上念延安戎夏雜處以公麟府
之後深識番情知延州軍州事端拱初邊鄙未寧胡羯
南牧議者或請堅壁以待之公以河北諸州繕修城壘

遂充天雄軍兵馬鈐轄知大名府復以上黨近邊素稱
難治知潞州軍州事咸有課最達于朝端上方考古道
興方田俾封疆之臣修耕戰之備公為代北方田都部
署事畢改并州兵馬鈐轄移夏州駐泊未幾知鳳翔府
事朝議以趙保忠歸鎮夏臺可息經費求其監護無易
公者遂再往馬公承上戢下頗叶便宜改石州駐泊上
以公驅馳且久齒髮漸高俾歸郡封以均勞逸在郡周
歲方將拜章乞骸歸老田里以淳化三年八月五日邁

疾終于官舍享年七十一娶張氏封清河郡君先公而
終子二人長某早亡次繼思左班殿直孫若干人長惟
德商州衙內都指揮使四年四月某日葬于開封府某
縣某鄉某里禮也公厯四朝事八主檢校官自常侍至
太保兼官自監察至大夫階自銀青至光祿勳自武騎
尉至上柱國爵自縣男至郡侯食邑自三百戶至一千戶
惟公謙和畏慎慈惠恭謹積此八者終身不怠嘗莅大
都臨劇務無留事無敗獄以矜嚴訓軍旅以持重守邊

防出疆有專對之才行師無失律之咎世之稱諳練時務者公實首焉及治商於郡事尤簡蓋國家優賢養老且休息之而早夜孜孜未始懈怠若初筮仕者每斷一大辟雖罪狀明白了無所疑亦必委細諮詢徧乎僚吏以至再三而後用法復能不忤物不近名奉詔條外不求赫赫之譽知屬吏過失未嘗面言必因公宴引數十年前事曰某人嘗為某過得某罪旁指曲諭微警誡之周旋愼密率多此類故能四十年間無纖芥之過始全

身于亂世終立事于清朝諸侯伯間未易可得考終牖
下不亦休哉某左官商山寔公之副熟聞履行得以直
書銘曰官二千石世祿之厚公能守兮齒七十一人生
之壽公能有兮委質明代保无咎兮歸全幽宅光有後
兮

殿中丞贈太常少卿桑公神道碑銘并序

按喪葬令五品已上立碑螭首龜趺高不得過九尺又
云文武五品已上致仕官薨卒者其弔祭賻物依見任

殿中丞品第五太常少卿品第四今雲中留後桑侯葵
先少卿樹碑于神道用舊制也公諱光輔字魯卿其先
弘羊以心計得幸于漢武世居東郡之黎陽徙家于高
平鉅野縣周顯德中以縣為濟州今為郡人焉曾祖某
祖某並隱晦不仕考諱某密州莒縣主簿公即莒縣府君
之長子以唐天祐甲戌歲生于鉅野既冠長七尺風貌峻
整襟懷豁如治三禮窮其淵奧隨鄉舉累上為權勢所
軋退耕肄業一不屑意太平興國初太宗皇帝親試舉

人拔孤貧湮厄之士公始以本科擢第於御前解褐許
州鄆城主簿會太宗親征并壘詔郡縣督民飛輓以餉
六師鄆城令當行令畏懦有憂色公曰古人辭易不辭
難急病讓夷吾之志也今天子蒙犯霜露弔伐叛逆臣
下宴安之時耶遂詣郡請代令行事畢賞勞改濰州團
練推官祕書省校書郎俄遷大理評事兼監察御史充
泰寧軍節度推官時留後已掌禁軍號御龍直以宿衛
忠謹恩顧彌渥因從容侍立奏曰臣父年齒甚高為藩

郡從事非所樂也臣坐享厚祿不得奉朝夕之膳心所未足因制授太子左贊善大夫致仕明年轉殿中丞賜五品服色優游輦下時議榮之以淳化二年六月十二日寢疾終于上郡之官舍享年七十八以留後貴賻贈有加是月權窆于法寶寺自淳化四年太宗郊祀至咸平元年今上嗣位由成均博士累贈奉常亞列夫人張氏先公而亡追封南陽郡太君子四人長曰贊即留後太傅次曰某次曰某次曰某女一人適某官以其年

某月某日葬于本縣獲麟鄉休祥里以清河郡太君祔
焉禮也公讀周公孔子之書而道屈于場屋負冉有季
路之政而命厄于州縣積善餘慶留後得之用能會風
雲于代邸執干戈以衛社安邊却敵勢如長城尊主庇
民精貫白日善訓之道有自來矣某鉅野人也為兒童
時少卿數來我家先人命拜少卿踞受曰童子荅某常
記之見託勒銘辭寔無愧銘曰富貴無種善惡有源不
在其身在其子孫少卿儒雅留後藩垣文武之道在公

一門公來懸車享茲眉壽何以饋之肥羜白酒公去賓
職處茲高堂何以貴之赤紱銀章令終帝里歸葬吾鄉
樂卿褒贈壟樹增光刻銘真宅千古流芳

右衛將軍秦公墓誌銘

并序

柏翳之盛享國于秦其後子孫或以為姓公諱某字某
廬江人也曾祖某唐末事吳以功為武昌軍節度使事
見前國史祖太岳州刺史父進遠宣州節度副使贈右
監門衛率府率公即率府之長子當李氏建大號也弱

冠起家補殿前承旨仍令禁中侍從先主歿中主嗣位以公為行從副使益加親信恩寵莫貳公謹儉惕勵卒于无咎中主幸南昌而終公寔扈從受遺命冊後主于建康禮畢議功將加不次公三上章願守陵寢情不可奪優詔許之授陵臺令朝夕灑掃朔望涕泣積十餘歲其志不哀後主聞之頗為悲慟詔書三下強起公為尚衣使澄心堂祇候澄心堂後主譙私之所也非親密未嘗至此凡關機務公必與焉王師弔伐之歲以公為杭

州兵馬都監擇才而捍難也師環金陵城中堅壁時朝廷命浙兵攻其東以公為壽昌殿使充建州監軍使知軍州事昇州不守止將盧絳率潰亂之兵屠歙州殺郡牧遠近為之震駭頃兵富沙逼我城壘公堅守力戰郡人獲全後主降詔于郡縣曰天命有歸無復顧望且命封府庫以聽朝旨公奉詔哭訖緘符印使次子義表納馬太祖嘉其為臣有節完郡有功璽書褒美錫賚有加以義為右班殿直公歸京師便殿得對恩禮越等授西

京作坊使金紫光祿大夫檢校司空兼御史大夫上柱
國初江表之平也諸郡守長于蒼黃中侵取官財用以
封殖後皆自敗並伏其辜惟公束身而歸毫釐無取太
宗嗣位素聞其事非時召見慰勞久之賜錢三十萬以
本官監白波軍居三年授西京巡檢使賜錢如白波之
數歲滿充廣英等十二州巡檢使又賜錢五十萬歸朝
改右監門衛將軍爵為開國侯食邑一千五百戶淮南
六州巡檢使轉右領軍衛將軍寔封二百戶淳化五年

歸朝以五月某日寢疾終于私第享年七十八夫人陳氏封潁川縣君以令淑聞于宗族先公而亡三子長曰著舉進士不第而卒次即義也今為西頭供奉官閤門祇候以才幹為時所推有後之慶其在茲乎季曰恭亦早夭二女並適人而逝以某年某月日葬于某州某縣某鄉某里以潁川縣君祔禮也某與義交甚熟託為銘曰李氏割據百官備具去就終始公得其所人皆冒榮我守臺陵銜哀十稔寵詔三徵人去危邦我保孤壘郡

民是完國亡而已人幸喪亂侵取公財我無一毫空手
而來我公來思二聖念之內職環尹便蕃寵綏人患凶
天我獨眉壽人憂子孫我獨有後天之報施在公匪謬
誌墓刻銘永光世胄

殿中丞贈戶部員外郎孫府君墓誌銘并序

端拱元年正月朔殿中丞富春孫公自龍州受代終于
岐山諸孤護喪權窆于許服闋長子何舉進士中甲科
聲名振天下俄拜右正言直史館賜三品服進階為朝

奉郎策勲為騎都尉且命副漕運使于畿甸之西按行
數十郡屬吏故人負弩望塵之不暇今春上郊祀畢以
何貴制贈殿中丞府君為尚書戶部員外郎將改葬請
進士王巖齋書來滁上乞銘于工部郎中王某公諱庸
字鼎臣其先出于姬姓春秋時事衛為卿三國時據吳
稱伯五代祖植始渡江為潁川長史高祖簡徙居于蔡
曾祖中祖真皆隱德不仕考諱鎰贈大理評事先妣劉
氏追封彭城縣太君皆從公之貴也公即評事之次子

少孤力學舉進士不第退而修經世之務欲以布衣干
天子取顯位而行道此其志也周顯德中徒步詣招諫
匭上贊聖策凡二十有四條多引貞觀時文貞公事以
自比世宗覽而竒之命策試于西掖解褐除開封府兵
曹叅軍會省吏貲再考而罷建隆初授河南府河南縣
主簿月餘丁彭城太君憂服竟留守向公從民之請以
前銜署攝又權司法叅軍乾德中調于天官得開封尉
以親王出尹而公實事之秩滿考績議當美遷會上言

全錄多缺有詔趨吏部亟行補注且曰無限品第因折
六資為登州錄事叅軍居十載不得代太平興國五年
徙官巴蜀會朝達表公之才且稱其滯上亦記公之名
始授太子左贊善大夫尋以本官知荊門軍事明年賜
緋衣銀章旌善政而酬久次也移典龍州軍州事雍熙
初遷殿中丞在郡四年復命得疾肩輿而歸享年六十
有七夫人張氏故國子博士潤之女也先公一年而亡
生以夫貴封清河縣君沒以子貴追封河內縣太君次

子僅舉進士文學如其兄次子侑少秀為詩長女適鄂
州錄事叅軍王道隆夫亡守志次女適進士劉仲堪俊
而有文某年某月某日葬于河南府某縣某鄉某里從
廷評府君之塋以河內太君祔焉禮也昔西漢選用經
術晁錯董仲舒以對策高第顯太宗褒拔王佐劉洎馬
周以上書稱旨達戶部其斯人之徒與蓋士君子得其
時則功成事立大位及于身無其時則卷道藏器餘慶
發于後報若影響曷嘗有差始世宗得公之策即欲擢

升諫垣有沂水人趙守微以草澤上章拜右拾遺未幾
坐家行不修貶商州戶曹掾丞相范魯公謂公誠有奇
才厯試而後用時移事去沉于州縣此一不遇也故事
尉兩畿四赤者滿歲則拜諫官御史由是而為大寮公
獨折資糾郡陸沉者十稔此二不遇也上久在藩邸僚
吏數多即位以來鮮不超擢其間才如孔維者亦至祭
酒而公守道退默未嘗自陳竟以列庶僚典遠郡而終
身焉此三不遇也嗚呼天其或者屈公之位而大公之

嗣乎至于業官之績可以為吏師修身之道可以為人
範廉財慎言出于天性好學博古老而不衰又今人之
所不及也具于家狀此不復書有文集二十卷行于代
味其言知其道矣初廷評府君以通五經隨計于僖宗
朝屬巢寇覆二京而罷干戈之中講議不輟秦宗權欲
引為賓介以疾拒之夫如是則戶部之賢三英之秀有
自来矣先是某為左司諫知制誥有以何之文相售者
見其文有韓柳風格因夸于同列薦于宰執間居數月

何始來候吾又得僅之文一編時給事中兼右庶子畢
公與吾同典誥命適來吾家因出僅文以示之讀未竟
乃大呼曰嚇死老夫矣其為名賢推服也如此僅之就
舉也以兄中狀元抑之末第方今搢紳中言掌誥之才
者咸曰朝廷不命其人則已命之則必何也塲屋中語
科第之殊級者亦曰國家罷舉則已舉不罷則首冠者
必僅也吾是以知廷評之積德戶部之道屈在夫三子
矣豈止文學之出人矣又將富貴之逼身也銘曰賢人

有位止于身貴無位于時子孫得之廷評素履家食而
已戶部偉才朝班而止貽謀遺志付于三子三子堂堂
天寔祐爾賦爾懿文錫爾繁祉翰飛聖朝何啻萬里君
子曰孫氏之諸孤其光顯于宋乎

累贈太子洗馬王府君墓誌銘并序

在昔唐鼎入梁諸侯各專其地就齊魯而言則王師範
據淄青時溥據徐宿朱瑄朱瑾據兗鄆皆南結吳人以
張聲援西向而拒梁梁太祖通和討伐智力殆盡僅能

平四州之地而吳軍北侵益急自清口之敗梁兵縮首
不出當時沂密之民被亂尤甚不死于餒即死于兵非
豪傑不能活妻子況庇其鄉黨乎于是民相保聚離為
八寨以捍南寇府君之祖諱某以負勇敢知禮義為鄉
人所推朝廷就署為沿邊八寨都指揮使却敵完民聲
入寇境雖吳弩之勁不敢北射一矢使人得耕桑嫁娶
如治平時後以老病而終府君之顯考諱某襲父職無
懈屬晉氏有平陽之辱中原無主賊帥趙重將掠高密

南奔顯考府君以父子繼職護邊窮追不已竟歿于賊
衆推府君嗣其事府君諱某字某時年十八雪泣枕戈
期以盡敵不墜世業邑人賴焉既而世宗以一代英主
削平淮夷府君始去兵即農厚自封植僮奴數百指奔
走供事樹桑墾土衣食以豐馬牛豚羊蕃息蔽野撻鮮
釀黍以享賓客聚書誨學以教子弟任俠自許弋獵為
娛遊人歸之如公郵里人服之如官府至于縣大夫郡
刺史咸禮重焉嘗歎曰自祖考及吾生在亂世庇民禦

寇其勤寔多未嘗授一官食糶粟報施之道吾有後乎
以開寶六年十月十二日終于家享年四十八始贈大
理評事再贈本寺丞今上即位贈某官夫人劉氏封彭
城縣太君淳化五年以疾終楚州官舍至道二年追封
南陽太君婦德母道有史館朱台符為之誌二男長曰
子輿字希孟擢進士第長于辭賦典麗可愛今為殿中
侍御史賜五品章服先是國家以鹺茗漕運之務付于
希孟東極溫福西盡荆湖南距番禺北止淮甸凡半天

下悉以委焉希孟裁量經制咸得其中宿弊舊訛一皆
剔削去繁存要公私便之每一艤舟一就館則郡縣申
牒委積如阜待報而返間不容時加以舊無規繩事有
利害希孟閱視剖判遣之如流施于有司靡不中理所
謂幹國之蠱兼人之才者也次曰某未冠而卒五女既
嫁而死在室而夭者凡四人焉今存者潤州司戶參軍
劉貞固之妻也以某年某月某日葬于密州莒縣某鄉
某里以南陽太君祔禮也王氏皆帝王之後居太原者

為姬姓隋末大儒號曰文中子府君之先也六代祖因
官密上愛岱嶽東蒙之秀又其俗被周公太公孔子之
化遂家焉至今密人呼忻代王家以別瑯琊之族夫如
是府君其周之苗裔乎某與希孟既為布衣交又為同
恩生重以宗盟情分款密丈人之墓所宜為銘曰姬姓
王氏居于太原隋文中子即其裔孫密上因官其後家
焉遇亂習武三世百年府君禦寇無祿無壽陰德所施
宜其有後乃生殿中少登秀茂立朝顯親褒贈禮厚揚

名以道克家惟孝誌墓刻銘永光祖考

小畜集卷二十九

欽定四庫全書薈要卷一萬四千一百五十五

集部

小畜集卷三十

宋 王禹偁 撰

誌碣

著作佐郎贈國子博士鞠君墓碣銘

并序

故泉州錄事叅軍贈太子洗馬陳君墓碣銘

并序

監察御史朱府君墓誌銘

并序

建谿處士贈大理評事柳府君墓碣銘

并序

著作佐郎贈國子博士鞠君墓碣銘

并序

鞠氏之先伯禽之裔也世為東萊著姓徙居高密公諱
與今上御名同字可久曾祖某孝弟力田不求聞達祖
真登州黃縣令父慶孫申州團練判官生母王氏故太
子少師延之次女左補闕史館修撰贈太師伸之從父
妹戶部侍郎叅知政事贈工部尚書沔之姑也申州府
君始娶某氏生子曰恂公即申州次子與弟愉皆王氏
出也幼聰悟善屬文漢乾祐中一上登進士第年二十
一榜中推為探花先輩解褐秘書省校書郎宰相范魯

公奏為集賢校理頃之求外官得鄆州觀察支使厯永興軍節度掌書記伊陽猗氏令蔡州防禦判官繼宰介休魏縣開寶五年故相國趙韓王取為著作佐郎與今兵部侍郎兼秘書監楊公徽之兵部郎中知制誥李公若拙故左補闕知制誥趙公隣幾同列東觀當時天下得佐著作局者唯公等四人而已才名第望輝映搢紳居無何授河清令以七年某月某日寢疾終于官舍享年四十七夫人于氏太常少卿鵬之次女也太平興國

七年某月某日終于私第年四十七二子長曰仲謀擢進士第仕太常博士次曰仲淵長女適太子中舍聶巨川次適故太常丞王禹錫次適聶巨容初公長兄恂早亡無嗣弟愉周廣順二年登進士第歷某官倉部員外郎知制誥張澹以女妻之生子曰孟容季昌女適周氏並早亡惟季女適靳氏在焉仲謀丁母憂時徒步詣申陝河洛扶護祖考暨叔父母兄孟容五喪東歸致書于我且曰叔父府君傳父兄之業敦孝友之行顯位未至

賦命不融我先妣太君貞淑慈愛和平均一兩院兒女
凡有九人訓撫提攜並如已子于今鄉人不知有從父
兄弟嗟予小子罪逆不孝祿不及親官忝通籍今奉天
子命得封贈父母未立片石以表墳墓大懼我祖考之
遺烈將墜于地幸與足下布衣之舊豈惜一言不慰因
極之心乎某謝而許之左官掖垣憂畏奔迫閏三月九
日晨及光州加祿驛晝寢既酣初夕無寐因命家僮秉
燭據行寔而書之公舉進士時著四時成歲賦萬餘言

聲振場屋與弟愉並有文集行于代嗚呼士之處世患才無所取名無所聞才名既立患無知己惟公負天才得高第復有范魯公趙相國為之引掖而不登朝籍終于畿令豈非命歟在其子孫必有達者銘曰鞠氏姬姓本出于魯世居東萊縫掖章甫明經神童里選鄉舉擢第業官不可勝數策進士名考登科記大鞠之門自公而始申州府君文學茂異命屈于時終于從事謀孫翼子在公昆弟猗嗟我公高才下位伯倫酒德披文見意

王績醉鄉含章遁世歿後二紀贈典方至猶限彝章成均博士孝子不匱永錫爾類

故泉州錄事叅軍贈太子洗馬陳君墓碣銘并序

兩漢公卿多補郡吏由督郵功曹而用者十有四五故其治道鄰于三代蓋考行于鄉試才于州而后登于朝也其得鄉舉里選之遺制歟其道雖廢其人或存陳府君近之矣唐末大亂天下分列東南曰閩有王審知者據之自立繼以季劉張陳凡五帥七十年雖附庸于江

南稱藩于中原其屬吏皆自署也至今鄉人以先輩呼其家君即先輩府君之子以文行稱于州里閩帥重而辟之君曰吾先人策名中夏適時不幸介在偽土義不食祿者全其節也雖專地悍師不敢加害名高而行著故也吾小子負荷世德未聞于朝一旦又將拒之禍且至矣又曰吾嘗被天子命無辱于先人也今時雖可惜而年已過矣吾其樂山水守松楸而終天年乎乃辭以老而命次子靖入于朝其後終於家享年七十初靖之

歸國也補許州司法叅軍時富春孫何濟陽丁謂皆當
世之文豪也靖與之交用是詞格日進端拱中拜疏議
邊上竒其節授將作監丞主利國監後隸御史府專以
制劾為職皆非所樂也繼上章言時事上益重之超拜
祕書丞直史館四年郊祀畢以靖貴贈府君洸馬明年
秋靖得告南歸且將以漏澤賁其墓墓有誌孫何為文
又請尚書禮部貲外郎知制誥王某書墓表某因謂曰
墓之有表古也然近世有德行無祿位者多表而旌之

據禮子為大夫父為士祭則大夫葬則士今洗馬祕書
俱為五品官而欲表之與無位者同矣何以示貴按令
五品已上立碑七品已上立碣誌其墓宜矣靖乃拜而
謝之君之行已業官理家訓子暨偽署官職卒葬之年
月宅兆之原里五男三女男為令子女得嘉壻凡是數
者孫之誌具焉夫人季氏封隴西縣太君亦從子之貴
也銘曰嬌姓後潁川陳永嘉亂徙于閩德不墜世有人
為從事登王賓拒偽命名益振生膳部行恂恂事連帥

始全身脩覲禮趨紫宸振有蘭佩有銀郡督郵始即真
生祕丞文彬彬遇聖主為史臣漏斯澤顯斯親時孝子
時孝孫碣其墳垂後昆

監察御史朱府君墓誌銘

并序

公諱遵式字咸則祁州無極人其先高辛氏有才子八
人朱虎其一也事舜為卿舜命伯益作虞官益讓於虎
則盛德之後從可知矣曾祖儼祖公政皆隱德不仕考
思瓊贈大理司直妣董氏追封隴西縣太君公即司直

府君之第二子也。幼而聰悟，不為嬉戲，始能言，即好誦書。將舉神童，內艱而罷。服闋，業文不舍，晝夜二十四應進士。凡四上為權勢所抑。周顯德初，翰林承旨、兵部侍郎徐公典貢舉，褒拔寒俊，精覈藝實。公始成名。世宗平壽春，戎帥楊信奏公為節度推官，得祕書省校書郎。兵革之餘，瘡痍未復，欽助軍政。公寔盡瘁。太祖開國，以恩例試大理評事，仍進階一級。是歲，師歸蒲津，縻以舊職。巨才屈乎幕府，清議聞諸朝廷。於時陝郊有逋民，本府

有鹺務左馮有旱災皆別勅委公按覆其事操及決滯
根節迎解乾德三年楊公薨僚佐並隨府罷新帥汾陽
郭公從義素聞公名留佐戎政辭避不獲黽勉就位汾
陽一幕公為末至奉上率下人無間言會詔下督藩臣舉
幕吏堪為升朝官者同舍郎皆促裝俟命汾陽諸侯之
賢者也以為非公不可塞詔第以賓佐故舊之情重難
其事因重午節請公修貢乃密以狀聞左右無能知者
拜監察御史制書先署舉主中書令名銜搢紳以為美

事鹽鐵奏秦州銀冶比多逋負未入之數不減萬計請
擇朝臣以主之相府以公前佐河中有廉幹之譽遂命
監馬乘驛之任復經舊府汾陽迎於遠郊具藩見臺憲
禮輟執御者對控公馬馬首小却即按轡懇揖並驅而
行蒲人榮之觀者如堵監銀冶凡八月宿弊盡去羨利
居多巴蜀初平呂翰嘯聚國家憂三峽諸郡以公為涪
州通判忠信篤敬蠻貊化之遂知軍州事歲滿夷獠相
率守闕乞留優詔許之仍降璽書褒美開寶五年始受

代入憲府掌內彈左補闕宗維忠以本官知濠梁家富
於財輕齎自奉解印之日有白金數千兩時輦下用中
黃門典關市之稅以為朝官祿薄疑有奸利即以事聞
太祖方責廉吏養疲民乃下御史府公親劾之其實家
財無贓污狀維忠請自誣以脫繫獄公不許刺問履歷
未嘗有瀆貨事乃請原其罪太祖召公詰讓曰囊橐如
此非盜於官即取於民書生相黨耶公曰維忠始下獄即
請服罪臣不忍希旨致人於法亂陛下邦憲因抱款占羅

列指摘詞氣不撓太祖怒曰吾將自決此獄安用御史為
遂坐維忠徒罪叱公使去公執簡而出無懼色時太宗
皇帝尹京觀公所守甚奇之使人慰勉曰為御史執法
當如是然中外恐懼憂在不測未幾以公監開寶監畏
避雷霆韜戢鋒鏑公餘與賓友縱飲而已八年郊祀畢
策勲柱國太宗嗣位加朝散大夫太平興國二年歸闕
屬軍國事繁未暇進用公微得風恙求判西京留臺遂
兼商稅事非所樂也明年得病告歸東京終於私第享

年五十五某年贈某官夫人杜氏宿州刺史雋之女也
從夫封京兆縣君從子追封某縣太君有婦道母德傳
於親族府君以清白捐館家無餘貲二男未冠五女未
笄居于京師嘗苦桂玉夫人一切儉約以身率下外求
師友以訓其子內修工容以教其女衣服飲食皆有撙
節唯買書則不問其價以至抽輟簪珥略無倦色雅好
內典達其旨趣又多智善解夢言未來事往往符驗晝
哭之後微有足疾杖而能行及聞長子登第因投杖而

起曰朱氏之門不墜矣吾為人婦為人母無負也足疾由是遂瘳見其子昇通籍板輿就養者十三年以某年某月某日終于舒州年六十九二子長曰九齡祕書省著作佐郎文學政事不墜家法次曰延齡舉進士不第而終五女長嫁殿中丞直集賢院程宿次嫁岳州司理叅軍郭夷簡次嫁張士廉次嫁張士宗並舉進士儒林之秀者也季女未出室以某年某月某日葬於某鄉某里以某縣太君祔焉禮也公負典誥之文止於牋檄有

愷悌之政流乎夷落練臺閣之儀老於錢穀時使然也
有郭令之慰薦受太宗之殊遇而不及顯位命使然也
夫位不充德者其後必大豈誣也哉某與大著作爲進
士同年請以詞臣之筆誌於丈人之墓銘曰人恤乎無
德不恤乎無位德位俱充惠於困窮匪吾之通位卑德
崇係於汙隆匪吾之窮展矣朱公抑揚古風策名筮仕
二十五年一入烏府終身不遷餘慶昌繁施及后昆賢
子令孫必大其門刻此清芳銘於九原

建谿處士贈大理評事柳府君墓碣銘并序

有唐以武戡亂以文化人自宰輔公卿至方伯連帥皆
用儒者為之而柳氏最稱顯族故子厚自言其家同時
為尚書郎者三十餘人其盛可知也於時宦遊之士率
以東南為善地每刺一郡殿一邦必留其宗屬子孫占
籍於治所蓋以江山泉石之秀異也至今吳越士人多
唐之舊族耳公諱崇字子高五代祖奧從季父冕廉問
閩川因奏署福州司馬改建州長史遂家焉奧生誕誕

生瓊瓊生祚祚生瞪於公為顯考公十歲而孤母夫人
丁氏養誨成人既冠屬王審知據福建以公補沙縣丞
時審知殘民自奉人多衣紙公曰此豈有道之穀耶即
以就養引去因自誓終身御布衣稱處士而已洎李氏
奄有江左其長子宜為太子校書郎江寧尉宰貴谿崇
仁建陽三邑拜監察御史次子宣試大理評事迎公于
建康時以宜貴當得致仕官切誠宜曰不可奏請以卒
吾志太祖平吳宜為費宰宣以校書郎為濟州團練推

官公始渡江省諸子自沂至濟自濟至京師得疾肩輿而歸以太平興國五年十一月某日終于濟之官舍享年六十三嫡夫人丁氏先公而亡追封某縣太君宜宣之母也宜今為國子博士宣終于大理司直天平軍節度推官今夫人虞氏封范陽縣大君生四子寘宏舉進士寘察並以辭學自立有後之慶為可知也女五人皆得佳壻初公之捐館也博士方按獄于沂聞訃號絕徒跣冒雪而行以至于濟時有詔不聽吏守三年喪博士負

縗經詣登聞院三上章乞護喪終制寢而不報又叩丞相馬泣訴其事雖不得請君子是之既而諸弟扶柩而歸權窆于所居之右以某年某月某日卜葬于某縣某鄉某里以先太君祔焉禮也公以行義著于州里以兢嚴治于閨門鄉人有小忿爭不詣官府決其曲直取公一言諸子諸婦勤修禮法雖從官千里若公在旁其修身訓子有如此者柳之姓自展禽始執卷者知之矣今略而不書博士之歸朝也得雷澤令雷澤某之故里也

始以邑中進士見句博士厚于我司直之從事于濟也某
家寓焉司直善于我又嘗拜廷評府君于堂上其為交
也可謂久矣乞銘公墓義不可辭銘曰處士之名兮象
著于天廷評之贈兮澤漏于泉子孫文雅兮後嗣綿綿
刻銘墓石兮以永千年

小畜集卷三十

謹案卷二十八第六頁前六行次于東沛洲下刊

本沛訛沛據周書改


第二十三頁後八行始得公以用之刊本得訛歸

據別本改

卷二十九第六頁前二行會太宗親征并壘刊本

征訛在并訛其據別本改





總校官庶吉士臣張能照

校對官中書臣金光悌

謄錄舉人臣龐兆懋

財團法人

佛陀教育基金會

釋淨空

敬贈

